



KEMENTERIAN SUMBER ASLI
DAN KELESTARIAN ALAM

KENYATAAN MEDIA

TAKZIAH ATAS PENEMUAN PETUGAS JUPEM DI SEMPADAN MALAYSIA-BRUNEI DARUSSALAM

Saya amat berduka cita apabila dimaklumkan mengenai perkembangan terbaru insiden yang menimpa seorang penjawat awam yang berdedikasi, Encik Donysius bin Gebrial Goh, petugas daripada Bahagian Pemetaan Topografi Sarawak, Jabatan Ukur dan Pemetaan Malaysia (JUPEM).

Susulan laporan terkini pada 25 Mac 2026, mangsa dipercayai telah ditemui di sungai kira-kira 500 meter dari lokasi terakhir beliau dilaporkan hilang. Mendiang merupakan seorang Pembantu Khidmat Am H1 di Pejabat Topografi Wilayah Miri telah menunjukkan pengorbanan besar demi negara ketika melaksanakan tugas rasmi penandaan dan pengukuran sempadan darat antarabangsa antara Malaysia dan Brunei Darussalam.

Bagi pihak Kementerian Sumber Asli dan Kelestarian Alam (NRES) serta seluruh warga JUPEM, saya ingin menzahirkan ucapan takziah yang paling mendalam kepada isteri dan dua (2) anak mendiang yang berusia 12 dan 10 tahun. Kehilangan ini amat meruntun jiwa, terutamanya memandangkan mendiang sedang berkhidmat dalam operasi mencabar demi kedaulatan tanah air. Pihak Kementerian akan memastikan segala bentuk bantuan dan sokongan moral diselaraskan sebaik mungkin untuk membantu keluarga mendiang mengharungi saat yang sukar ini.

Saya juga ingin merakamkan setinggi-tinggi penghargaan dan terima kasih kepada Kerajaan Brunei Darussalam atas kerjasama erat serta komitmen yang tidak berbelah bahagi sepanjang operasi Mencari dan Menyelamat (SAR) ini dijalankan. Penghargaan khusus ditujukan kepada Pasukan SAR Brunei Darussalam, Tentera Darat Diraja Brunei dan Tentera Gurkha atas bantuan keanggotaan tambahan yang diberikan.

Saya juga amat menghargai sokongan Tentera Udara Diraja Brunei yang menyediakan pesawat helikopter bagi operasi mengeluarkan jenazah dari kawasan yang sukar diakses serta bantuan daripada Pasukan Polis Diraja Brunei dan pihak Hospital RIPAS Bandar Seri Begawan yang membantu dalam proses forensik serta bedah siasat.

Tidak lupa juga saya ingin merakamkan ucapan terima kasih kepada JUPEM, Kementerian Luar Negeri (KLN), Majlis Keselamatan Negara (MKN), Polis Diraja Malaysia (PDRM) serta semua individu sama ada secara langsung atau tidak langsung yang telah menghulurkan bantuan dan juga tenaga dari mula pencarian sehinggalah proses menuntut jenazah mendiang.

Kerjasama antara kedua-dua negara kini sedang tertumpu kepada proses pengecaman dan dokumentasi sebelum jenazah mendiang dibawa pulang ke Malaysia setelah semua prosedur pentadbiran di Brunei Darussalam selesai sepenuhnya. Segala jasa dan khidmat bakti mendiang Donysius bin Gebrial Goh akan sentiasa dikenang oleh negara dan semoga keluarga mendiang diberikan kekuatan serta ketabahan dalam menghadapi ujian ini.

DATO' SRI ARTHUR JOSEPH KURUP
MENTERI SUMBER ASLI DAN KELESTARIAN ALAM
19 MAC 2026

